



Nagradni konkurs za plakat

Udruženje likovnih umjetnika primijenjenih umjetnosti i dizajnera BiH ULUPUBIH poziva dizajnere da kreiraju plakat sa nazivom **Welcome Home** i uzmu učešće u izložbi koja će biti otvorena u okviru Sarajevske zime 2017. od 25. februara do 11. marta.

Pobjednik konkursa će biti proglašen na otvaranju izložbe 25. februara 2017. godine. Biće nagrađen jedan rad nagradom u iznosu od 500,00 KM

Konkurs je otvoren od 15. januara do 15. februara 2017 u 24.00 sata CET.

Kreativna ideja

U svijetu globalne strukture pojam kuće, doma (Home) mijenja smisao i značenje. Prinuđen različitim pritiscima, prirodnim ili civilizacijskim katastrofama i mnogobrojnim motivima veliki broj ljudi je kroz istoriju bio primoran da mijenja mjesto boravka i stalno prebivalište. Čini se da je danas takvo kretanje brojnije i vidljivije nego ikada prije.

Migracija (emigracija/imigracija) - u širem smislu, prostorna pokretljivost stanovništva; u užem smislu, trajna promjena mjesta stalnog boravka pojedinca ili skupine ljudi.

Projekat istražuje lične utiske, izazvane socijalno-političkim uticajima i nastale kretanjem stanovništva, promenama mesta boravka, odlascima i povratcima, migracijom, egzilom, progonom, izmiještanjem ljudi iz konteksta formiranih lokacija i identiteta, kroz vizuelni komentar reduciran u ograničenu formu jednog medija – plakata koji relativno lako prelazi sa galerijskog zida u javnost ulice i multipliciranu javnost internetske mreže. U fokusu su ideje i prakse koje ovaj globalni društveni fenomen iskazuju vizuelnim sredstvima, znakovim i simbolima, u jednom od najpopularnijih formata grafičkog dizajna.

Namjera nam je da podstaknemo razumijevanje termina i imaginativno odgonetanje pripadnosti ograničenim teritorijalnim ili pak globalnim zajednicama. U fokusu radova mogu biti i slike, simboli i poruke koje propituju granice i identitete, doprinose isticanju ljudskog prava na slobodu kretanja, te argumentovanim simbolima i razmišljanjima doprinosi oslobađanju od predrasuda o drugima i drugačijima, o mjestima i nastambama, o kulturama i zajednicama i o pravu čovjeka na sigurnost i sopstveni dom.

Prijave

Plakati se prijavljuju e-mailom na adresu ulupubih@gmail.com

1. Plakat treba biti dizajniran na formatu B1, 700x1000mm, horizontalno ili vertikalno, a za žiriranje treba poslati na email digitalni fajl, jpg ili pdf, 2500x3500 pixela ili veličine A4. Uz to treba priložiti i jpg fajl za objavljivanje na internetu, 315x450 pixela.
2. Radovi se prijavljuju pod šifrom. Ime fajla je naziv rada i šifra (npr: Welcome Home 123am)
3. Žiri u sastavu: Ibrahim Spahić, Dalida Karić-Hadžiahmetović i Dejan Slavuljica će zasijedati 16. ili 17. februara 2017.
4. Prihvaćeni printani plakati za izložbu se predaju u Collegiumu artisticumu, 22. i 23. februara.
5. Članovi ULUPUBIH-a mogu poslati fajl za print, a Udruženje će organizovati štampu, uz dogovor o nadoknadi uz članarinu.
6. Na plakat treba staviti logo Sarajevska zime.
7. Na konkursu mogu učesvovati dizajneri iz regiona, profesionalci, studenti i ostali zainteresovani autori. Svaki učesnik može prijaviti neograničen broj radova.
8. Dodjela nagrade i diploma će biti organizovana na svečanom otvaranju izložbe 25. februara 2017. godine u Galeriji Collegium artisticum.